

<><><><><><>

Prakram Diwas

नेता जी सुभाष चंद्र बोस हुंदे सम्मान च अज्ज उंदी 128मीं ब'रेगंड दे मौके उप्पर देसै च पराक्रम दिवस मनाया जा करदा ऐ। इस मौके उप्पर संस्कृति मंत्रालय आसेआ नेताजी हुंदे जरम आहली थाहर यानि कट्टक ओडीशा च त्र'ऊं दिनें तगर चलने आहले कार्यक्रमें दा सरिस्ता कीता जा करदा ऐ। ध्यानजोग ऐ जे अपने हाल दे मन की बात कार्यक्रम च प्रधानमंत्री नरेन्द्र मोदी होरें पराक्रम दिवस दा जिक्र करदे होई नेताजी सुभाष चंद्र बोस हुंदे जोगदानें गी चेत्ता कीता हा। मोदी होरें सुभाष चंद्र बोस होरें'गी इक दूरदर्शी करार दिंदे होई देशै दे बसनीकें गी गुजारिश कीती ही जे ओह सुभाष चंद्र बोस हुंदे जीवन थमां प्रेरणा लैन।

<><><><><><>

Netaji-Prez-VP-PM

राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेन्द्र मोदी होरें नेता जी सुभाष चन्द्र बोस होरें गी उंदी जयंति पर श्रद्धांजलि अर्पित कीती, जिसी अज्ज पराक्रम दिवस दे रूपै च मनाया जा करदा ऐ। सोशल मीडिया दी इक पोस्ट च राष्ट्रपति होरें आखेआ ऐ जे नेता जी होर भारत दी आजादी दी लड़ाई च सब्बने शा पक्के निश्चे आली ते प्रेरणादायी शख्सियत हे। अपने संदेस च उपराष्ट्रपति होरें आखेआ ऐ जे भारत दी आजादी लेई नेता जी हुंदा समर्पण ते आजाद हिंद फौज दा गठन, उंदे नजरियै ते पराक्रम दा बड़डा सबूत हा। प्रधानमंत्री मोदी होरें आखेआ ऐ जे भारत दे स्वतंत्रता संग्राम च सुभाष चन्द्र बोस हुंदा योगदान बेजोड़ ऐ। श्री मोदी होरें आखेआ जे उंदे बचार ते नजरिया देसै गी विकसित राष्ट्र बनाने च सदा मार्गदर्शन करदा रौहग।

<><><><><><>

Badhaal Updates

रजौरी दे जिला मैजिस्ट्रेट होरें कोटरंका सब-डिवीजन च रहस्यमयी बमारी दे लपेटे च आए दे बडहाल गां गी नियंत्रित इलाका यानि कन्टेनमेंट जोन घोषित करी दित्ता ऐ। तोआई बडहाल गां थमां 4 होर लोक इस रहस्यमयी बमारी करी कसरी होई गे न जिंदे च 3 भैहनां शामिल न। इ'नें सब्बनें गी बडहाल गांS थमां अस्पताल च भर्ती करोआया गेआ ऐ। इस गांS च पिच्छले 47एं दिनें दरान इस रहस्यमयी बमारी करी 17एं लोकें दी मौत होई गेदी ऐ। केन्द्री गृह मंत्रालय नै इ'नें मौतें दी जांच लेई इक केन्द्री टीम खड़ेरी दी ऐ जेहदी तफ्तीश बरोबर जारी ऐ। सूत्तरें मूजब, 16एं थमां 22एं ब'रें दी उग्री दिएं त्रै भैहनें गी कल उसलै बडहाल थमां सरकारी मेडिकल कॉलेज रजौरी च मुंतकिल कीता गेआ जिसलै उंदी सेहत चानचक्क गै मती बिगड़ी गई। इंदे च 22एं बरें दी तज़ीम अख्तर, 18एं ब'रें दी खालिदा बेगम ते 16एं ब'रें दी नाज़िया कौसर शामिल न। एह सब्बै बडहाल गां दे रन्थान मोरा दे बसनीक बाग हुसैन दिआं धीआं न। इ'नें त्रौनें भैहनें गी भारती वायु सेना दे हेलीकाप्टर राहें रजौरी थमां जीएमसी जम्मू पुजाया गेआ। इंदे अलावा कल दपैहरी 18एं ब'रें दी शबनम अख्तर गी बी कसरी होने पर बडहाल गां थमां जीएमसी रजौरी पुजाया गेआ। परोआर दे सदस्यें ते रिश्तेदारें दी गुजारिश पर उसी बी जीएमसी जम्मू रैफर कीता जा करदा ऐ। इ'नें सब्बनें मरीजें गी बखार ते होर दुइयां इक्कै नेइयां समस्यां पेश आवै करदिआं न। एह चौनें

मरीज ओकडे त्रै परोआरें दे नेडुमे रिश्तेदार न जिंदे सदस्यें दी इस रहस्यमयी बमारी करी मौतां होई दियां न। तोआई 25एं ब'रें दे जावेद अहमद नांS दे इक होर मरीज दी हालत मती बिगड़ी जाने पर उसी जीएमसी जम्मू थमां ब्हाई रस्तेया पीजीआई चंडीगढ़ लेता गेआ ऐ। जंदी संज्ञां हासल होई दी रिपोर्ट मूजब ओदी हालत स्थिर दस्सी जा करदी ऐ। नमीं दिल्ली थमां बक्ख-बक्ख मंत्रालयें आहली इक टीम नै अपनी जांच दे हिस्से दे तौर उपपर उपपरोतली त्रीये ध्याड़े बडहाल ग्रां दा दौरा लाया।

<><><><><><>

R-Day Tableaux

गणतंत्र दिवस दी 75मीं परेड दरान देसे दी बन्न-सबन्नता ते सांस्कृतिक साग्रता गी दशग्रने आली बक्ख-बक्ख राज्यें, केन्द्र शासत प्रदेशें ते केन्द्री मंत्रालयें दियां कुल 26 झांकियां तैआर कीतियां गेइयां न। इस बारी इनें झांकिएं दा विशे-सार ऐ:-“स्वर्णिम भारत : विरासत और विकास”। परेड च 16 राज्यें ते केन्द्र शासत प्रदेशें दे कन्नो कन्नी 10 मंत्रालयें ते मैह्कमे दे अनोखा विशे आली झांकियां शामिल होंगन। रक्षा मंत्रालय मूजब एह झांकियां भारत दी बन्न-सबन्नी क्षमताएं दी प्रदर्शन करगंन। इस ब'रे परेड दा खास आकर्षण एह ऐ जे त्रौने सेनाएं दे “सशक्त ते सुरक्षित भारत” आले विशे पर आधारित झांकी बी एह्दे च हिस्सा लैग।

<><><><><><>

R-Day Security

औंदे गणतंत्र दिवस गी दिखदे होई जम्मू-कश्मीर च सुरक्षा दे निगगर बंदोबस्त कीते गेदे न। 26 जनवरी दा मुख्य कार्यक्रम जम्मू च मोलाना आजाद स्टेडियम च उपराज्यपाल मनोज सिन्हा हुंदी प्रधानता च होग ते मुख्यमंत्री उमर अब्दुल्ला होर कार्यक्रम दे आदरजोग परौहने होडन। एहदे मदेनजर समूलचे जम्मू-कश्मीर च सुरक्षा स्थिति गी होर तगड़ा करी दित्ता गेदा ऐ। पुलस ते अर्ध सैनिक बलें दी अंतरराष्ट्रीय बन्ने ते नियंत्रण रेखा उपपर बाहू तैनाती कीती गई ऐ। एहदे अलावा प्रशासन नै सब्बनें सरकारी ईमारतें गी शैल सनाह्कड़े ढंगै कन्नै सजाने ते रोशन करने सने समूलचे केन्द्र शासित प्रदेश च राष्ट्री गौरव ते एकता दे प्रतीक राष्ट्री झंडे गी चाढ़ने दे बी निर्देश दित्ते ग न। सब्बनें ईमारतें गी तिरंगे दे रंगें दियें रोशनी कन्नै सजाने उपपर मुख्य ध्यान दित्ता जा रदा ऐ। एहदे अलावा सब्बनें सरकारी मलाजमें गी निर्देश दित्ता गेदा ऐ जे ओह् अपने-अपने जिलें च होने आहले गणतंत्र दिवस दे अधिकारिक समारोह च हिस्सा लैन।

<><><><><><>